



«ՀԱՍՏԱՏՈՒՄ ԵՄ»

Հայաստանի Հանրապետության ներքին գործերի
նախարարության կրթահամալիրի ռեկտոր, ի.գ.թ.,
դոցենտ

Մ. Մուրադյան

«03» 06

2026թ.

Կ Ա Ր Ծ Ի Ք

Առաջատար կազմակերպության՝ ՀՀ ՆԳՆ կրթահամալիրի՝ Սուրեն Սարգսի
Բաղինյանի՝ «Պետական դավաճանության քննության մեթոդիկայի
առանձնահատկությունները» թեմայով ԺԲ.00.04 – Դատական իրավունք
(դատարանակազմություն, քաղաքացիական դատավարություն, վարչական
դատավարություն, քրեական դատավարություն, կրիմինալիստիկա,
դատական փորձաքննություն, փաստաբանություն, օպերատիվ-
հետախուզական գործունեության տեսություն) մասնագիտությամբ
իրավաբանական գիտությունների թեկնածուի գիտական աստիճանի
հայցման ատենախոսության վերաբերյալ

Հայաստանի Հանրապետության ներքին գործերի նախարարության կրթահա-
մալիրի ոստիկանական ուսումնական ստորաբաժանման օպերատիվ-հետախուզա-
կան գործունեության և քրեագիտության ամբիոնը՝ մասնակցությամբ իրավաբանա-
կան գիտությունների թեկնածու, դոցենտ Ա.Ռ.Հովհաննիսյանի, իրավաբանական գի-
տությունների թեկնածու, դոցենտ Դ.Ա.Թումասյանի, իրավաբանական գիտություննե-
րի թեկնածու, դոցենտ Ա.Լ.Բագրատյանի, իրավաբանական գիտությունների թեկնա-
ծու Ա.Վ.Ասլանյանի, իրավաբանական գիտությունների թեկնածու Ա.Ա.Գևորգյանի,
իրավաբանական գիտությունների թեկնածու Գ.Գ.Ստեփանյանի, իրավաբանական
գիտությունների թեկնածու Ա.Կ.Մինասյանի քննարկեց Սուրեն Սարգսի Բաղինյանի՝
«Պետական դավաճանության քննության մեթոդիկայի առանձնահատկությունները»
թեմայով ԺԲ.00.04 – Դատական իրավունք (դատարանակազմություն, քաղաքացիա-
կան դատավարություն, վարչական դատավարություն, քրեական դատավարություն,
կրիմինալիստիկա, դատական փորձաքննություն, փաստաբանություն, օպերատիվ-
հետախուզական գործունեության տեսություն) մասնագիտությամբ իրավաբանական

գիտությունների թեկնածուի գիտական աստիճանի հայցման ատենախոսությունը և հանգեց ներքոթվարկյալ հետևություններին:

Ս.Բաղինյանի ատենախոսության թեմայի արդիականությունը կասկած չի հարուցում և պայմանավորված է հետևյալ հանգամանքներով:

Ներկայացված ատենախոսական հետազոտությունը նվիրված է պետաիրավական նշանակություն ունեցող խնդրի՝ պետական դավաճանության քննության մեթոդիկայի ձևավորմանը: Վերջին տարիներին Հայաստանի Հանրապետությունում, ինչպես նաև հետխորհրդային տարածքում արձանագրվում է պետական դավաճանության (լրտեսության) դեպքերի աճ, ինչը՝ այդ թվում պայմանավորված է տարածաշրջանային քաղաքական բարդ իրադրությամբ, հիբրիդային պատերազմների մեթոդների կիրառմամբ և օտարերկրյա հատուկ ծառայությունների ակտիվությամբ: Հեղինակը մատնանշում է, որ 2020-2021թթ. քննվել են միայն 2 գործ, իսկ 2022 թ.՝ 24, 2023 թ.՝ 9 գործ, ինչը վկայում է հանցագործությունների տվյալ տեսակի դինամիկ աճի և պետական անվտանգության համար դրանց սպառնալիքի մասին:

Ատենախոսության թեմայի արդիականությունը պայմանավորված է ոչ միայն վիճակագրական ցուցանիշներով, այլև այդ կարգի գործերի քննության մեթոդիկային նվիրված ամբողջական ուսումնասիրության բացակայությամբ, իսկ առկա աշխատանքները հիմնականում շոշափում են հիմնախնդրի քրեաիրավական ասպեկտները: Միևնույն ժամանակ, այդ իրավիճակին նպաստում է նաև այն, որ նշված հանցանքի վարույթով դատաքննությունն իրականացվում է դռնփակ պայմաններում, ինչը սահմանափակում է հետազոտողների հնարավորությունները: Այս պայմաններում Ս. Բաղինյանի կատարած աշխատանքը լրացնում է կրիմինալիստիկական գիտության մեջ առկա կարևոր բացը և ունի ինչպես տեսական, այնպես էլ կիրառական նշանակություն:

Հետազոտությունը լուծում է մի շարք հրատապ խնդիրներ՝ մշակելով պետական դավաճանության քննության մեթոդիկա՝ սկսած հանցագործության կրիմինալիստիկական բնութագրից մինչև առանձին քննչական և գաղտնի քննչական գործողությունների կատարման մարտավարական-տեխնոլոգիական առանձնահատկությունները:

Հեղինակի կողմից ձևակերպված առաջարկությունները (օրենսդրության փոփոխության, հետաքննության և քննչական մարմինների փոխգործողության օպտիմալացման վերաբերյալ) ունեն անմիջական գործնական արժեք:

Ատենախոսության *նպատակը* հստակ է ձևակերպված՝ պետական դավաճանության քննության համակարգային ուսումնասիրություն, տեսական և գործնական հիմնախնդիրների վերհանում, ինչպես նաև օրենսդրության ու իրավակիրառ պրակտիկայի կատարելագործմանն ուղղված առաջարկությունների մշակումը:

Հետազոտության խնդիրները տրամաբանորեն բխում են նպատակից և դրանք ըստ էության կարող են համարվել լուծված:

Ատենախոսության *գիտական նորույթը* կայանում է նրանում, որ այն հայրենական իրավագիտության մեջ առաջին ամբողջական և համապարփակ ուսումնասիրությունն է, որտեղ փորձ է արվել համակողմանիորեն քննարկել պետական դավաճանության գործերով քննության մեթոդիկայի հիմնահարցերը: Գիտական նորույթն արտացոլված է նաև պաշտպանության ներկայացվող հիմնական դրույթներում:

Ատենախոսության *մեթոդաբանական հիմքը* լիովին համապատասխանում է հետազոտության նպատակին և խնդիրներին: Առանձնահատուկ ուշադրության է արժանի հեղինակի կողմից էմպիրիկ նյութի (դատական պրակտիկայի, քննչական փորձի) համադրումը տեսական վերլուծության հետ, ինչը բարձրացնում է ատենախոսության հավաստիությունը:

Հեղինակի կողմից օգտագործված գրականության ցանկը (ավելի քան 170 անուն) ընդգրկում է ինչպես հայ, այնպես էլ արտասահմանյան (հիմնականում ռուսաստանյան) հեղինակների հիմնարար աշխատությունները: Մասնավորապես, հենվել է Ա.Գ.Կուլևի, Ա.Վ.Նեստերովի, Մ.Յու.Միլանայի, Վ.Գ.Ենգիբարյանի, Ա.Ս.Չախոյանի, Ռ.Ս. Բելկինի, Ի.Մ. Գուտկինի և այլոց աշխատություններին:

Տեսական հիմքի որակը բնութագրվում է նրանով, որ հեղինակն օգտագործել է ոչ միայն կրիմինալիստիկական, այլև քրեաիրավական, քրեադատավարական, կրիմինոլոգիական գիտելիքներ: Առանձնակի արժեքավոր է, որ հեղինակը վերլուծել է ՀՀ վճռաբեկ դատարանի, Մարդու իրավունքների եվրոպական դատարանի իրավական դիրքորոշումները, ինչպես նաև միջազգային լավագույն փորձը:

Հետազոտության էմպիրիկ հիմքը պետք է համարել պատշաճ և բավարար, որը հնարավորություն է տվել հեղինակին ձևակերպել հիմնավորված եզրակացություններ և առաջարկություններ:

Ատենախոսությունն առանձնանում է տրամաբանական ամբողջականությամբ և գիտական ճշգրտությամբ, դրա արդյունքներն ունեն գործնական նշանակություն, որոնք կարող են կիրառվել գիտական հետազոտություններում, օրենսդրական նախաձեռնությունների ժամանակ, իրավակիրառ պրակտիկայում և ուսումնական գործընթացում:

Ատենախոսության եզրակացությունն ամփոփում է հետազոտության արդյունքները և ներկայացնում հիմնական առաջարկությունները:

Հեղինակը խոսքը պատշաճ է, նա տիրապետում է գիտական ոճին, մասնագիտական տերմինաբանությունը օգտագործվել է ճիշտ և հիմնավորված, տեքստը շարադրված է հստակ և հետևողականորեն: Ատենախոսությունը ձևակերպված է ՀՀ ԲՈԿ տեխնիկական պահանջներին համապատասխան, ունի անհրաժեշտ բաժիններ, հղումներ, ծանոթագրություններ:

Ատենախոսության հիմնական արդյունքները ներկայացվել են հեղինակի կողմից գիտական հոդվածներում: Ատենախոսության սեղմագիրը և հրատարակված հոդվածներն արտացոլում են ատենախոսության հիմնական դրույթները և չեն հակասում դրանց:

Միևնույն ժամանակ անհրաժեշտ ենք համարում ատենախոսություն վերաբերյալ ներկայացնել որոշակի նկատառումներ.

1. Ատենախոսության մի շարք հատվածներում նկատվում է կրիմինալիստիկական և քրեաիրավական վերլուծությունների անհամաչափություն, ինչի հետևանքով աշխատանքի առանձին բաժիններում կրիմինալիստիկական բաղադրիչը երկրորդական պլան է մղվում: Օրինակ, առաջին գլխում զգալի ծավալ են զբաղեցնում քրեաիրավական բնույթի վերլուծությունները, մինչդեռ պետական դավաճանության կրիմինալիստիկական բնութագրի տարրերը երբեմն ներկայացվում են ոչ բավարար խորությամբ:

2. Աշխատանքում օգտագործվող «կրիմինալիստիկական մեխանիզմ», «տիպային մոդել», «քննչական իրավիճակ» հասկացությունները միշտ չէ, որ ունեն բավարար

տեսական սահմանազատում և հստակ տարբերակում հարակից կրիմինալիստիկական կատեգորիաներից:

3. Ատենախոսության մի շարք հատվածներում (1-ին գլխի 2-րդ և 3-րդ պարագրաֆներ, 2-րդ գլխի 2-րդ և 3-րդ պարագրաֆներ) հեղինակը քննարկման առարկա է դարձնում տուժողի անձը, մինչդեռ պետական դավաճանության դեպքում տուժողը ֆիզիկական կամ իրավաբանական անձը չէ, այլ՝ պետությունը:

4. Ինչպես նշում է հեղինակը, հետազոտության ընթացքում կատարվել են հարցումներ քննիչների և օպերատիվ աշխատակիցների շրջանում, սակայն ատենախոսության մեջ ներկայացված չէ հարցման ժամանակահատվածը, հարցաշարի կառուցվածքը, հարցվածների ընտրության չափանիշները (փորձի տևողությունը, զբաղեցրած պաշտոնը, կրթական մակարդակը և այլն), ինչը թույլ կտար փաստել հարցման ռեպրեզենտատիվությունը և պատշաճ գնահատել հարցման արդյունքների ու հետազոտության արդյունքում արված հետևությունների միջև կապը:

5. Պաշտպանության ներկայացված 1-ին դրույթը դուրս է գալիս հետազոտության առարկայից, քանի որ այդ դրույթն ըստ էության արարքի քրեականացմանն ու պետական դավաճանության քրեաիրավական որակման հստակեցման ուղղված օրենսդրական առաջարկ է:

Ինչպես երևում է նշված նկատառումների բովանդակությունից, դրանք կրում են մասնավոր բնույթ և չեն արժեզրկում ընդհանուր առմամբ հաջողված ատենախոսությունը ու պայմանավորված են հեղինակի հետագա աշխատանքներն առավել կատարյալ տեսնելու ցանկությամբ:

ՀԵՏԵՎՈՒԹՅՈՒՆ. Սուրեն Սարգսի Բաղինյանի՝ «Պետական դավաճանության քննության մեթոդիկայի առանձնահատկությունները» թեմայով ատենախոսությունը համապատասխանում է ՀՀ ԲՈԿ-ի կողմից ներկայացվող պահանջներին, իրենից ներկայացնում է պետական դավաճանության փաստով քննության մեթոդիկային, քրեական վարույթի պատշաճ կազմակերպմանը, քննչական և օպերատիվ-հետախուզական մարմինների համագործակցության վերաբերյալ համակարգված, համալիր և ավարտուն հետազոտություն, իսկ դրա հեղինակն արժանի է իրավաբանական գիտությունների թեկնածուի գիտական աստիճանի շնորհման՝ ԺԲ.00.04 – Դատական

իրավունք (դատարանակազմություն, քաղաքացիական դատավարություն, վարչական դատավարություն, քրեական դատավարություն, կրիմինալիստիկա, դատական փորձաքննություն, փաստաբանություն, օպերատիվ-հետախուզական գործունեության տեսություն) մասնագիտությամբ:

Սուրեն Բաղինյանի ատենախոսության վերաբերյալ առաջատար կազմակերպության կարծիքը պատրաստվել է կրթահամալիրի ոստիկանական ուսումնական ստորաբաժանման օպերատիվ-հետախուզական գործունեության և քրեագիտության ամբիոնի՝ համատեղման կարգով դասախոս, իրավաբանական գիտությունների թեկնածու, դոցենտ Արտակ Հովհաննիսյանի կողմից (քննարկվել և հավանության է արժանացել ամբիոնի՝ 2026թ.-ի հունիսի 3-ի նիստում, արձանագրություն № 11):

Հայաստանի Հանրապետության ներքին գործերի նախարարության կրթահամալիրի ոստիկանական ուսումնական ստորաբաժանման օպերատիվ-հետախուզական գործունեության և քրեագիտության ամբիոնի պետ՝ Մանուկ Սեմերջյան

«03» հուլիս 2026թ.

Մ.Սեմերջյանի ստորագրությունը հավաստում են՝
ՀՀ ՆԳՆ կրթահամալիրի վարչական աշխատանքները
համակարգող պրոռեկտոր Ս.Սուրիապյան

